



partii naleraq

Nuuk 8. oktober 2018  
UKA2018/19  
Hans Enoksen Partii Naleraq

**Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarneq pillugu inatsisip (Kinguaassiuutitigut pinerluttarnerit il.il.) allangortinneri pillugit inatsisissatut siunnersuummut missingiummut Namminersorlutik Oqartussat isumaqataanissaat pillugu Inatsisartut aalajangiiffigisassaattut siunnersuut (Isumaginninnermut Inatsisinillu Atuutsitsinermut Naalakkersuisoq)**

### **Siullermeenera**

Kalaallit nunaanni pinerluttulerinermi inatsisip allangortinnissaat pillugit tassalu kinguaassiuutitigut atornerluisarnermut tunngasut pillugit saqqummiusaaq oqaaseqarfigissavarput.

Nunatsinni kinguaassiuutitigut pinerluuteqarnerit assut ilungersunartorujussuurtut isigigatsigit pingaartumik meerannguit imminnut illersorsinnaangitsut taamatut inuunertik tamaat innarlerneqartarat akuersaangilluinnaratsigu, taamatullu pinerluttarnerit ullumikkornit sukannernerujussuarmik akiortariaqalerpagut, aammalu pillaasanermut tunngasut sakkortuinngorlugit nunatsinni aaqgissuunnissat suliarisariaqalerparput.

Pinerluttarnerimmi sakkortusiartuinnarput, tamannalu aamma pinerlussimasunik pillaasarnermi inatsimmik nunatsinni peqartariaqalerpugut, naammakkunnaarpormi pineqaatissiinermut inatsit kisiat tunngavigissallugu pingaartumik pinerluttarnerit sakkortuut ukiumi kingullerni saqqummiartuinnartut akiorneqassappata.

Innuttaasut ataasiakkaat pitsaanerusumik illersorneqarnissaat inatsisip sinaakkutaasa ersarissaaffiginerisigut pinerluffigineqarsimasut illersorneqarnissaat.

Ilaqutariit qanigisaminnik qatanngutiminilluunniit pinerluuteqarnerup isigineqarnera aamma qatanngutisianut ilannguneqarnissaa tamakkiisumik taperserparput. Tassami akuersarneqarsinnaangivippoq ilaqutaminnik qanigisaminnik pinerlunnikkut kinguaassiuutitigut atornerluisarneq kangunarluinnarpoq akuersarneqarsinnaangilluinnarporlu taamatut inissittarnerput.

Ukiuni makkunani, qujanartumik innuttaasut pinerluffigineqarsimasut annertuumik illersorneqarnissaanik suliniutit, kommunit peqatigalugit kiisalu meeqqat illersuisuat annertuumik suliniuteqarnera assut iluarisimaarlugu oqaatigerusupparput, tassungaannarli killissanngilagut kinguaassiuutitigut pinngitsaaliilluni inersimasunik, pingaartumillu meeqqanik kinguaassiuutitigut innarliisarnerit ataatsimoorluta sakkortuumik akiortariaqarparput.

Katsorsaanerit pinerluffigineqarsimasunik periarfissaq siulleq atorlugu aallartinneqartarnissaat aningaasatigullu malinnaatinneqarnissaat annertunerusumillu aningaasalerneqarnissaat kissaatigalugu oqaatigissavarput.

Pissutsit pitsaanerulissappata nunatsinni inuttut inuunikkut atukkagut eqqarsaatigisariaqalerpagut ullumikkornit pitsaanerulumik inuunerissaarnerulertariaqarpugut tamannalu allangortinneqassappat inuunerput allangortilluinnartariaqalerparput.

Imigassartorpallaarpugut aangajaarniutitik atuivallaarpugut, ilami aamma peqqinnerunissatsinnut uagutsinnut piumaffiginerulertariaqarpugut ulluinnarni inuunerlunnerup kingunerisaanik peqqinnissaqarfimmut aningaasarpasuit atortarpagut inuunerissaarneruleruttami aningaasat allarpasuarput nuussinnaagaluarpagut inuttut nuannaarnerulernitsinnut saatissinnaagaluarpagut taamaattumik inuunerissaarnerulernissamut periarfissat pitsaanerulissappata inuusaaserput ullumikkut allangortilluinnartariaqarpugut.

Tassami ulluinnarni ajornartorsiutigut assigiinngitsorpassuarnik tunngaveqarpugut inissaaleqinerit, suliffissaaleqinerit, imigassartorpallaarnerit, aangajaarniutitik atuinerit, taakkuinnaalluunniit qaangersinnaagaluarutsigit illoraap tungaanut alloriarnerit annertuut tikisinnaagaluarpagut.

Taamatut oqaaseqarluta ataatsimiititaliamut suliaannorlugu ingerlatipparpugut.